

CONVENIO DE COLABORACIÓN PARA A REALIZACIÓN DO EVENTO “CARTA DE SANTIAGO” NA CIDADE DA CULTURA DE GALICIA

MEMORIA XUSTIFICATIVA

A Directora Xerente da Fundación Cidade da Cultura de Galicia, **DECLARA:**

Que esta Fundación Cidade da Cultura de Galicia formalizou o 27 de outubro de 2021 con **FUNDACIÓN PAIDEIA GALIZA** o instrumento convencional arriba referido por unha duración prevista entre a data de sinatura e o 7 de novembro de 2021.

Que o instrumento convencional ten por obxecto:

A concreción dos aspectos organizativos entre as dúas fundacións, para a celebración do evento "Carta de Santiago. Diálogos para unha sociedade de futuro", do 5 al 7 de novembro de 2021.

O evento cultural está enmarcado dentro das accións do Xacobeo 21-22 no cal participarán figuras relevantes en distintos ámbitos da cultura e a sociedade, persoeiros de prestixio internacional, recoñecidos polo seu labor en distintas disciplinas, que debaterán sobre o modelo de sociedade que está por vir, e sobre como queremos participar del, desde a positividade, a integración e a sustentabilidade. Complementarase ademais con propostas artísticas de creadoras e creadores.

O encontro promove a reflexión e o debate sobre a sustentabilidade, entendida arredor de catro áreas: economía, medio ambiente, ciencia e cidadanía, dentro dunha matriz conceptual sistémica e ecosocial, integradora das singularidades, e con perspectiva de



xénero. Nestas catro grandes áreas artellaranse 21 temáticas de reflexión, que inclúen temas como clima, océanos, territorios e transición enerxética no eido medio ambiental; xenética, neurociencia, intelixencia artificial, saúde ou utopías e distopías no eido científico; economía rexenerativa e do ben común, modelo de mercado, dixitalización e emprendemento no eido económico; e educación, desigualdades, identidade, fronteiras, arte, pensamento e participación cidadá no eido político-social.

Deste foro de debate xurdirá a publicación Carta de Santiago, un documento no que se recollan as reflexións xeradas no encontro e tamén textos que complementen as conversas e debates ao vivo.

Que o instrumento convencional que se asina se fundamentan no seguinte:

A Fundación Cidade da Cultura de Galicia foi constituída como organización de natureza fundacional, de interese galego, sen ánimo de lucro, cun patrimonio afecto de maneira duradeira á realización dos fins de interese xeral propios da Institución. A Fundación Cidade da Cultura de Galicia ten por obxecto creación, explotación e promoción de áreas ou centros de conservación, produción, exhibición y consumo cultural, comunicativo e tecnolóxico que constitúa un espazo multifuncional, multidisciplinar e aglutinador propicio a interacción cultural.

O desenvolvemento do obxecto fundacional poderá realizarse directamente pola fundación, ou mediante colaboración con outras entidades, organismos, institucións ou persoas que contribúan á consecución dos fins fundacionais.

Segundo o artigo 6 dos estatutos da Fundación Cidade da Cultura de Galicia constitúe o seu obxecto social *“a creación, explotación e promoción de áreas ou centros de conservación, produción, exhibición e consumo cultural, comunicativo e tecnolóxico, que constitúa un espazo multifuncional, multidisciplinar e aglutinador, propicio á interacción cultural”*.



Para a consecución dos fins mencionados no apartado anterior, a fundación pode realizar, entre outras, as seguintes actividades:

- a) *As necesarias para converterse nun actor clave na difusión cultural, que serva de punto de encontro entre os cidadáns e a cultura.*
- b) *As que contribúan a desempeñar un papel destacado no proceso de enriquecemento/aprendizaxe cultural da cidadanía, con especial énfase na adopción e uso das novas tecnoloxías.*
- c) *As que fomenten a interrelación e os proxectos en conxunto entre axentes de distintos ámbitos das industrias culturais e creativas, con especial énfase na cooperación interrexional e a colaboración pública e privada.*

En virtude do mandamento estatutario, a Fundación promove a realización todo tipo de actividades de carácter cultural e de lecer, como mostra de integración da cultura internacional con actividades de espaxemento e eventos sociais, e procura a consecución dos seguintes obxectivos;

-Ofertarlle á cidadanía unha actividade e programación de calidade, acorde coa magnitude do contedor arquitectónico.

-Constituírse como o espazo natural de desenvolvemento, proxección e fomento da innovación do sistema cultural galego.

Que **Fundación Paideia Galiza** foi constituída en 1986, como unha Fundación de interese galego, sen ánimo de lucro, cuxo patrimonio queda afectado de modo duradeiro á realización dos fins de interese xeral propios da Fundación.



A Fundación ten por finalidade e obxecto permanente:

- a) *A atención, formación, orientación, documentación, estudo e investigación ou calquera outra forma de intervención nos campos das ciencias humanas e sociais.*
- b) *A atención, formación, orientación, documentación, estudo e investigación ou calquera outra forma de intervención na problemática xerada por calquera tipo de exclusión social.*
- c) *A promoción e realización de actividades de interese educativo, cultural, científico, deportivo, sanitario, de cooperación para o desenvolvemento, de fomento da economía social, de conservación do medio ambiente, de promoción do voluntariado ou outras de análogo interese humano e social.*
- d) A promoción e desenvolvemento de accións dirixidas a impulsar o emprendemento, promovendo a creación de empresas, de proxectos innovadores e a xeración de empregos.

Que a Fundación Paideia Galiza asinou coa Xunta de Galicia un convenio para a realización de diversas actividades no marco da actividade “Carta de Santiago”, entre as que se atopa “*Carta de Santiago. Diálogos para unha sociedade de futuro*”. Trátase dun encontro de tres días que terá lugar do 5 ao 7 de novembro e cuxa celebración está pensada para ser realizada no novo Edificio Fontán da Cidade da Cultura.



Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela

Ana Isabel Vázquez Reboredo

Directora Xerente

Fundación Cidade da Cultura de Galicia

